

16. maj 2019

UPA 2019/30

Nuungaatsiarmit Illorsuarmit qimarnunneqarneranni, inuiaqatigiinniit inissanik taarsiilluni agguaassinermi neqeroorutaasut pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Karl-Kristian Kruse, Siumut)

Inatsisartunut ilaasortap Karl-Kristian Kruse Siumumeersup Nuugaatsiarmit Illorsuarmit 2017-imi tassaarsuaqarnerata kingorna qimarnunneqarnermikkut inuiaqatigiinniit inissanik taarsiilluni agguaassinermi neqeroorutaasut pillugit apeqquteqaat aallaavigalugu oqallinnissamik siunnersuutaanut Siumumiit qujavugut, taannalu imaattumik oqaaseqarfigissavarput.

Inuiaat kalaallit ajunaarnersuarmik 2017-imi nalaanneqarnerput tamatsinnut sakkortuumik misigissutsikkut equivoq. Pinngortitarsuup nukingi imaannaanngissinnaasaqisut takutinneqarput, tassami ajunaarnersuaqarnerup kinguneraa nunaqarfiit eqqorneqartut marluk inuerutsikkallarnerannik.

Ajunaarnersuaqarmat Oqartussat iliuuseqarasuarnerat Siumumiit assorsuaq nersugassaasutut isumaqarfigaarput, tassuunakkullu takutinneqarpoq upalungaarsimanikkut nunarput qanoq toqqissisimanartigisumik inissisimasoq, naak sineriassuarmi isorartoqisumi najugaqaraluarluta. Tassuunakkullu inuit upalungaarsimaneq eqqarsaatigalugu illersorneqarnerat qanoq pingaartinneqartigisoq aamma takussutissinneqarpoq.

Taamaammat ajunaarnersuaqarnerata nalaani taamatullu kingorna inuit piumassutsiminnik Oqartussaasut peqatigalugit ikiuukkasuarsimasut qamanga pisumik Siumumiit qutsavigerusuppagut, kiisalu innuttaasut eqqorneqartut ikiorneqarnerannut atatillugu nunat allat aammalu suliniaqatigiiffiit assigisaallu annertuumik ikiorsiissuteqarsimanerat qujassutissaavoq annertoq.

Innuttaasut nunaqarfimminniit qimarnunneqarnerisa soorunami kinguneraa assigiinngitsutigut ikiuinissaq, tamannalu Oqartussat tungaanniit qulakkeerneqarpoq iliuuseqarfigineqarlunilu. Eqqorneqartut inuunermut ingerlariaqqinnissaat eqqarsaatigalugu inissaannik qulakkeerininniarneq Siumup isumaa naappertorlu tassaavoq tamanit pingaarnerpaaq. Toqqissisimanartumimmi peqqinnartumillu inuuneqarnissamat angerlarsimaffeqarneq tamanit pingaarnersaammat.

Siunnersuuteqartullu oqallisissiamik qulequtsiisimaneq eqqarsaatigalugu pineqartunut inissanik taarsiilluni agguaassinermi neqeroorutaasut eqqartuiffigineqarnissaat ujarorpaa, paasisatigummi eqqugaasut naligiimmik pineqanngitsutut nalilerneqarmata.

Naalakkersuisut siorna aasakkut pineqartunut inissianik taartissanik agguaanermi tunngavissanik aalajangersaapput taakkulu tunngavissat Inatsisartut Aningaasaqarneremut ataatsimiititaliaannit akuersissutigineqarlutik. Taakkuali aalajangersakkat ilumut pineqartunut naappertuunnersut

oqallisissiaq manna aqputigalugu ataavartumik nalilersuiffigineqarnissaat Siumumiit piumasaraarput. Siumumimi isumarput naappertorlugu ajunaarnersuarmik peqquteqartumik annaasaqarneq allanit tamanit immikkuullarissuuvoq, taamaammallu taarsiissuteqartoqarsinnaanermut tunngavissiorneq naliginnaasumik iliuserineqartussanit allanit allaanerusutut taasinnaallutigu. Eqqorneqartunut ikiuiniarnermut assigiimmik pinninneq tunngavigineqartoq Naalakkersuisuniit oqaatigineqarpoq, tamannali naligiimmik pinninnerunersoq Siumumiit sukumiisumik nalilersuiffigineqartariaqartoq isumaqarluta.

Naggataatigut ajunaarnersuarmik eqqugaasut nunaqarfimminnut angerlaqqinnissaat siunertaralugu sulinerup ingerlaannarnissaa piaartumillu naliliiffigeqqinneqarnissaa Siumumiit piumasaraarput, paasissutissat sukumiisut ilaatigut upalungaarsimanermut tunngassuteqartut annertusaavigineqarnissaat aamma eqqarsaatigalugit. Allatut oqaatigalugu, siullertut Illorsuarmit upalungaarsimanermut piumasaaqatit naammassineqarnerisiut piaartumik nunaminnut uternissaat Naalakkersuisut qulakkeerniartuassagaat Siumumiit piumasaraarput. Minnerunngitsumik eqqarsaatigalugu Illorsuarmit ajunaarnersuarmit pineqartumit toqqaannartumik eqqugaanngimmata annaasaqaratillu. Taamaattumik taakku piaarnerpaamik nunaqarfimminnut utertinneqarnissaat pingaaruteqarluinnartutut Siumumit isigaarput.

Qujanaq.

Anders Olsen, Siumut.